

U ovih zadnjih petnaestak dana sam se baš nahodala po ovoj našoj Bosni i nešto manje po Hercegovini i mogu vam reći da bih voljela da nisam. Naime, svugdje i na svakom mjestu možete osjetiti kako nervoza i neizvjesnost naprosto vise u zraku i kako se iza njih polako, ali sve slobodnije pojavljuju bijes i ogorčenost. A to je vrlo opasna smjesa koju je teško kontrolirati, jer je eksplozivna i ima jednu ružnu osobinu - naime, kad eksplodira više se nikada ne može vratiti u prvobitno stanje - bez obzira na utrošeni trud, vrijeme i posljedično novac. A pošto svaka vrsta agresije mora biti usmjerena, tako je i ova usmjerena na - pogodite koga? Naravno, na Njegovo veličanstvo Vlast u liku i djelu dragih nam vođa... Pardon, političara. Ne volim kritikovati generalno, ali vjerujem da se možemo složiti kako imamo vrlo malo sposobnih, još manje principijelnih, a najmanje onih koji su u politici iz osjećaja obaveze prema svojoj djeci i društvu u cjelini. Uglavnom, tu su oni koji su se uhvatili toga, jer je, kako to tačno detektiraju obični smrtnici - pos'o lahak, a parali... Međutim, vremena koja su pred nama su toliko teška (da sam političar rekla bih kompleksna) da će mnogi poželjeti da su se držali svojih starih zanimacija. Bit će i priličan

broj onih koji će željeti da su imali pametnije i malo manje ambiciozne žene. Jer, kao što rekoh na početku - kad tad - dođe Omer po svoje... A ako se pitate koji Omer - pa evo: Kad je svojevremeno turski sultan poslao Omer-pašu Latasa da umiri vazda nemirnu Bosnu, a Boga mi i Hercegovinu, ovaj odmah u Sarajevo pozva sve viđenije ljude tog doba na "sjetovanje". Oni, koji se polakomiše na pašinsku trpezu pa zanemarujući zdrav razum i reputaciju Pašinu, dođoše u Sarajevo gdje odmah bijahu uhapšeni i po vrlo kratkom postupku osuđeni na smrt. Tada je bio običaj da nakon svakog pogubljenja pukne top sa žute tabije. I tako - svako malo pukne top s tabije, a za to vrijeme neki siromašni hamal uvrh Bistrika u hladnom kućerku se "otima" sa ženom za pokratak, potanak i iskrpljen jorgan. Negdje pred zoru ga žena onako bunovna i neispavana brižno pokrije i reče: "Hvala Bogu, pa si ti meni niko i ništa..." **B**

Aida Delić

Glavna i odgovorna urednica

• Ski oprema

• Frizerski saloni

• Pošta i mijenice

• Poliklinika